

COMUNICATO n. 152 del 24/01/2026

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 24 de jené vegn fora la puntata #522 del program ladin per la television

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 522. I argomenc che vegn portà dant te la puntata de chesta setemèna l é:

Ai 21 de jené l é stat chiamà ite a Trent la Conferenza de la mendranzes del Trentin. Al orden del di l era l Pian anuèl de l’informazion, la spartijion de la resorse metudes a la leta da la Provinzia per la mendranzes e la revijion di ejames de ladin, mochen o zimber per l patentin.

Col projet “Piste azzurre” da 20 egn en ca vegn endrezà arcedamenc de champions de schi de nonzech a livel internazionèl te noscia val. N projet che fèsc cognoscer nosc raion e ge dèsc luster a Fascia, olache ti meisc che vegn vegnarà endrezà garejèdes de schi e de ski cross de copa del mond.

Te la rubrica de aprofondiment “Zebicher, per veder più davejin” se à desleà l carnascèr te Fascia. Ai 17 de jené, da Sènt Antone da la ciampaneles, aldò de la tradizion l é temp de carnascèr, chest an na ocasion per pontèr via con n nef projet. L grop de la mèscres de Dèlba e Penìa, con autres 10 gropes da duta la dolomites, l Istitut Cultural Ladin majon di fascegn e a cef l Museo de la Mascherèdes Dolomitiches de Belun i à metù a jir n percors per mantegnir viva chesta tradizion e per la fèr doventèr patrimonie imaterièl UNESCO. La dì la é stata averta col forum de la rei de la mascherèdes arcaiches per n moment de confront e tor su i sentimenc più fons de chesta tradizion veiora.

I reports de chesta setemèna i é stac enjigné e porté dant da Angela Pederiva e Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN** - vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Traduzion di Servijes Linguistics e Culturèi del Comun general de Fascia

(cdt)